

1346 dulus Principis frater, in castra ad ea quæ e Republica essent providenda venire, atque iccirco *Provisores* ab initio hujusmodi magistratus appellatos existimo: nos vero ubique Legatorum nomen libentius usurpabimus. Sub eorum accessum placuit terra marique urbem oppugnari: acceperant, credo, Lodovicum cum ingentibus copiis appropinquare. Magno igitur certamine urbem adorti, hinc navales turmæ pontes e navibus in muros demittere, atque in urbem transcendere conabantur, inde terrestres copiarum vineas, arietes, aliaque bellica opera muris admovebant. Utrobique res parum prospere mota est. Transcenderant in muros ab initio aliqui, pontibus e summitate navium ad mœnia admotis, ingentemque oppidanis trepidationem injecerant: cæsi etiam ex hostibus nonnulli primo incurfu: mox vero desperatione adaecti impetum in socios navales faciunt, mœnibus deturbant, pontes, quicunque fuerant admoti, aut non multo post erant admovendi, refringunt; quibus disiectis, rejiciuntur cum ignominia ab oppido classarii milites. Nec terrestre prælium sælicius fuit: nam machinæ, quæ mœnibus admoveri debebant, inter agendum fractæ irritos fecere Venetorum conatus. Militibus igitur certamine aversis datum est signum receptui. Secundum hanc pugnam Lodovicus Rex cum centum & viginti millibus armatorum circa Jaderam tumultuose confedit: qui ut urbem suæ fidei traditam obsidione levaret, confestim ad Venetæ munitionis oppugnationem accurrit: dat signum pugnæ. Barbari terribili clamore Venetum vallum invadunt, rati neque fossas neque munitiones ullas esse, quæ suos remorari possent conatus. Jaderenses & ipsi, eruptione facta, præsidium una oppugnare adorti sunt. Veneti non solum cætera strenue defendunt, sed a vallo quoque cum multa cæde barbarum summovent. Interim qui in navibus erant, audito clamore, rati, quod erat, suos acri oppugnatione laborare, confestim, relicto ad naves præsidio, in littus defiliunt, ac denso agmine ad opem ferendam accurrunt. Quod quidem conspicati, qui intra munitiones erant, sublato clamore, repente in hostem erumpunt.

*Veneri Jaderam obsident, & oppugnant.*